

心

知

堂

詩

稿

序

少海明府詩名徧吳越然與余未相識也癸未春忽寓書京師以海塘諸詩見示且曰某私淑先生久矣願請益焉余受而讀之適壯有鐘呂音歎爲詩豪恨相知晚今年夏乃郵其集如干卷曰髫吟曰下峽曰嘉州甲子以前作也曰出棧曰燕臺曰易水曰春明日入棧己巳以前作也曰萍梗曰匏繫丙子以前作也自癸卯迄丙子凡二十有四年君未筮仕時出處略見于此登覽之作瑰奇奧衍脇入竅出徑路絕而風雲通言志之作慷慨激昂颺發泉涌冰雪澄而肝膽白攄情述事之作肫摯悱惻紆餘委備不煩斤削而中規繩蓋君以蜀才擅

夙慧鄉薦後屢困公車其跼蹐魁磊不可一世之槩愴
怳鬱伊勃窳而一發之于詩是故望之而其氣超然卽
之而其光赭然誦之而其音璆然鏗然網絡羣流囊括
衆有卓乎樹一家之幟而非餘子所能及也抑余聞之
文章者經濟之餘也君子浙稱循吏久矣今茲遷泣首
邑將益大其設施舟霖海宇膏潤黎赤而豈僅以詩鳴
一世哉書以復於君請以爲他日券也道光乙酉七月
十日歙鮑桂星

序

江水發源自崑崙山之南河在其北流經歷西域大小諸國至金沙江而入中土歷蜀楚吳巨都滇黔西秦之水皆自遠來會又分其支流北合於淮凡入江之水其越都會者十有一翕受吐納倍於河然當其過灩澦下巫峽湍急陜迫勿能以自騁吾往者足跼舌橋爲之駭顧而今乃遇諸汪子少海之詩汪子之爲詩才大而氣盛能自極其力之所至少歷屯困名譽傾公卿由乙科出爲縣令有治聲因微累罷去

天子知其廉能而惜其戾於法於是汪子謝事湖上編次其未去官之前諸詩若干卷屬予以爲序予惟蜀古

多詩人相如揚雄白軾以迄明楊慎氏其才皆天下選
近又得吾友張翰林問陶翰林之詩奇險捷出不主故
常其極主於能道人意中事而止汪子沈縉奧鑿句鏤
字鍛又善用事相佐證翰林純以天勝而汪子兼盡學
力吾觀江水始發源氣脈雄盛所向輒達及遇大險阻
則古之神聖奇士有不得不出於人力之所爲要皆與
其形勢相稱吾嘗游歷東西川徧窺其山水奇勝作爲
詩歌恨未有以盡其能以故翰林之渾成汪子之刻削
皆爲予所心服然翰林由吏部出守青州不久謝病歸
所見諸政事者未克盡暴著天下汪子之吏能頌於民
奏於大吏見稱於

天子雖爲法見抑其亦猶江水之入峽天故蓄其勢爲
合衆水大小以入海之地耶汪子交游滿宇內博積而
日久厚集焉必至於海其不徒爲以詩自名無疑也世
之君子由詩以知其人由人以知其政凡此者皆汪子
所自致吾又安能窮其所終極耶道光六年丙戌秋仲
婁姚椿序

序

蓋聞詩有二要曰氣與情鮮豪宕之氣者辭巧而格卑
乏昭藐之情者貌榮而神頽然氣貴顛實惟鬱乃宣情
嫌徑遂由釀斯婉雷霆藏熱儵矚駭乎六虛竿笙會和
始蜚蛇於九奏知此說者可與讀少海詩矣少海汪君
余辛酉所得士也績學石室標奇錦城燈盞對乎蝸髻
碁局試其鳳藻振衣九折之坂惟聞風聲濯筆百花之
潭時染雲氣用能咀嚼宮徵發揮性情鶴鳴高秋鯨拔
巨浪蓋將繼草堂之遺響踵眉山而嗣音焉或謂葩華
萍發宜揚輝於木天風飈迅流必竦韻乎蓬籍何以劉
滄仙格屢困春官潘岳雋才竟屈塵吏名場滯其鮎竹

宦境阻於羝藩得毋詩能窮人文將憎命乎不知琴尾
遇麤厥聲迺宏鐘唇練霜其吼益健使彼途寬驥熟帆
順舟輕雖益華篇或參庸響夫惟淹蹇壯齒稽留中達
盛志衝激而高流虹霓元音頓挫而清振林木馳驅棧
雪之地沈吟燕雲之天遠懷古人呼明月而與語近愴
風物臨滄波而渺然碧牕一鐙獨寫歸夢青嶂兩屐忽
開壯襟莫不忼慨命篇低徊申意蛟龍畏其險句風雨
候其清詞氣鬱彌宣斯爲證已或又謂韡笏之會嘯歌
勿驩簿書之旁神明易悶一行作吏相知幾人未免倥
傴裝懷芊眠謝志執是而言則又俱矣夫因境移心者
其學淺也緣俗損韻者其本浮也以少海餐古飫今陶

神練思秋水淨于方寸春陽流于談笑窺所展布莫非
性靈不廢官事自然風雅桐江曉發答畫眉之清歌柯
亭夜駐采椽竹之餘韻潮平風定浩吟海壖野潤雨濃
飛唱湖曲單詞隻句素心織以成文長謳短謠蒼生喜
而相告視彼神頽筦絃慮墮敲扑者情之相越蓋鵬鷃
爾至其凌鮑跨謝躡杜追韓吹霜噴露之奇搜春摘卉
之艷神劍千辟但爲寒光仙霞四照皆有異色洵足環
絡藻府護持文壇識者躋諸無庸旒贅今者袁生磨盾
終軍請纓涼州之行倣裝有日佇見投筆烏支之域橫
槊臯蘭之山蒲匄酒酣隴水助之嗚咽楊柳笛起玉關
寫其蒼涼露布餘墨灑爲鐫歌霜郊班馬申以長嘯崎

嶮之境盡闢怫悅之思益開而余旣辱苔岑亦忝葭串
爰墨集首以臚斯遊他日樂府黃塵新聲朱鷺宏辭壯
篇速附軫獵以示我也道光六年丙戌秋仲仁和錢棧

心知堂詩稿

題詞

吳振棫 仲雲

西川節度開幕府幕客論文不論武阿翁郵書告
游子道有詩人筆如虎太白東坡骨俱朽未料山
川落誰手我時思君不得見欲騎日月向西走蜀
江東下何迢迢入海吹作錢唐潮君來作令吟更
豪吟聲却鬥潮聲高罷吟肯訪南歸客客帽還留
點蒼雪冷巷喧喧喝道來林鳥驚啼聲欲裂相思
相見轉含愁正是花溪浣花節人生仕宦不稱意
楚弓得失眞兒戲側聞舐鼎有神丹雞犬升天太

容易篋中蜀錦三尺強笑喚孺人裁作囊不盛青
銅錢惟有佳篇章篇章亦如蜀江水洗濯錦段生
光芒世間武庫皆凡鏤破研爲爐鑄心血爭看龍
文寶鼎成不愁虎氣干將折聞君新詩多變聲胃
中五嶽何由平荷花已落柳葉老西湖雖好無以
怡君情金鏤拂馬耳玉帖壓馬骨途窮豈敢怨行
役且看涼州古明月明月照伊涼河流一線黃神
仙釀作崑崙觴秋霜夜拂崑崙頂王母梳頭雪垂
領十二樓邊銅柱傾寂寞瑤房見星影我欲攜君
飲於此一醉千日不復醒吁嗟乎蜀江江畔花如
織灑灑瞿唐路何極蛟鼉食人挾餘怒萬里青天

歸不得坐客休彈蜀國弦子規風雨海棠煙回頭
多少淒涼事我亦成都住十年

朱昇佑

篁雨

峽勢欲傾地灘聲疑上天文章爭險峻造物亦雕
鐫夜月山頭市春帆樹杪船茂陵吊病客封禪續
遺編

長揖辭鄉國狂謠出益門鞭絲巴雨色衣帶嶺雲
痕文譽牛心重書生馬骨尊歧途一回首尚有草
堂存

上國升沈感中年哀樂情蜀鵲都化魄塞雁不成
聲才調潘騎省狂名阮步兵桑乾一夜雨十丈怒

潮生

支清彥 一山

當代如椽筆齊駢更幾人負才何率律造句必精
神奇氣搜逾出長歌肆倍醇舊時箏笛耳洗淨快
無倫

嶄絕三巴路崎嶇石作屏文章鑿幽險山水假精
靈出入褒斜路雕鏤造化形去天真一握榻管走
風霆

一代追唐手千秋論史宗江山感風景歌哭爲英
雄弔古奇情勃懷人至性通扶輪真鉅製李杜欲
無功

奮袂挽狂瀾隄防障急湍都將詩萬首併入雪千
盤手掣鯨波立胸吞蜃市寬詞章與吏治只要寸
心安

不以風騷重風騷倍可珍好官齊衆口餘事作吟
身筆落驚天外名揚到海濱不才蒙拂拭沆瀣愧
前因

以上總題

顏檢

惺甫

路千里山萬重一帆一日懸天風四十九渡雲生
胸山萬重路千里孤客孤舟紀地理一百八盤石
鎮紙嵯峨峻嶺五丁驅奔騰巨浪蛟龍俱天以山
水炫奇特人與性命爭須臾子規聲亂啼哀猿復

驚夢得渡鬼門關不人人鮓甕輕舠如箭下洪濤
翻嫌此來太倥偬波平天氣清日落羣鴉闌篷窗
潑墨記所游猶若十二巫山一一倒掛芙蓉送讀
詩我徘徊耳畔濤聲來瀾翻筆底轟晴雷浪雪几
上霏皚皚但憑忠信爲生涯此身入險出險頓覺
颯爽心神開吾子此行何壯哉

和次前韻

張懷淮

王漢

江波滾滾山重重崩雷噴雪驅長風雲水蕩漾迷
心胸銅鉦聲忽喧郵籤難記里神禹當年治水時
南條北條各分理少海扁舟竟過之大勝讀書鑽
故紙旣無秦皇之鞭爲前驅徒令怪石磊磊落落

朝夕相與俱快哉片帆駕高浪千里一棹真須臾
巫峯上插雲神女空尋夢逼仄天一綫入峽如入
甕萬山走馬爭倥偬灘聲搏戰鄒魯閑應是三千
七百年前庚辰今日知君來神工鬼斧擘破峭壁
江流送棹歌細讀心徘徊濤聲走入空堂來詞源
倒捲喧如雷白雪調高世寡和銀山際空光皚皚
海若驚避愁無涯但見混茫一氣不可以暫住三
峽怒吼夔門開細流之水何有哉

王

霽

伯雨

水湧長空石湧灘布帆無恙出巔岼瀛堂若得從
容到莫忘當年蜀道難

刺梅花底雨瀟瀟卷裏奇情不可招忽憶棧行三十首天教勁敵失田橋

以上下峽集

楊芳燦

客裳

回首風煙愴客魂天邊參井手親捫奇峯十萬爭來送自跨青驪出益門

顏檢

盪胸層雲起入眼皆山岑神工鑿險地蜀道寒人心游子立萬仞懷古情何深英雄自千載天風吹墓林空餘雙劍清時聞山鳥吟捫星出長棧絕勝窮追尋蘸筆紀奇境奇氣來我襟坐間嵐雨合紙上天光侵拂拂滿生意胸中羅古今至今臥游處

塔影懸雲簪

程尚濂 息廬

山行不必乘標赤手直欲殲竊藥水行不必乘桴
赤脚直欲騎鯨魚巨靈一劈支祈鎖腕底芙蓉千
萬朶鏟平疊嶂踏驚濤生馬長蛇無不可徑將大
冶鍊飛霞玉爐自炷溫溫火我今衰叅君少年宗
之瀟灑詩中仙珊瑚彩筆拂雲去千丈長松十丈
蓮

張懷淮

萬疊奇峯文字緣一鞭安穩下青天匆匆蜀道畱
題處又被人間喚謫仙

黃劍香鑊

角龍怒衙衙伸爪抉壁出橫空劈雷火變此五色
筆攫拏六合閒雲詭而波譎鳥道逢五丁卓地忽
人立瞿唐牛馬奔束之吼更急雕鑱洩真宰萬鬼
同聲泣當時倉頡豪對此爽然失我從紙上觀目
駭更心怵尚恐鱗之而攫我入石室道旁羣小兒
能勿亟走匿錢塘怒潮來萬弩勿敢逼行看筆鋒
掃百怪詘神力他時許借讀晴空星斗濕

潘志華石甫

磨蝎生逢廿九年銀筆彈斷十三絃情田早種相
思樹苦海誰撐大願船頭上有巾空漉酒詩中無

字不啼鵲長安草草營齋奠都是侯門買賦錢

顏檢

昔我南北驅車來簿書叢集如雲堆棄置文字不
復道坐看硯匣封塵埃蒼生愧無絲毫補空糜食
祿貽嘲哈得釋韁羈荷簑笠蕭然竟與鷗鳬偕重
拭冰絃理舊軫一彈再鼓難和諧卅年心手不相
習茫茫回首心爲哀汪子翩翩蜀名士駿骨欲上
黃金臺壯懷倒傾巴峽水世塵不入冰雪懷踏泥
但畱飛鴻爪尋山還曳青棕鞋羨我結廬無車馬
同我下榻歡樽罍排空遠列雲外岫却暑清蔭庭
中槐自謂此中得妙境應有妙語畱山隈興酣搖

筆吐風月醉墨淋紙生瓊瑰阿其所好忘其醜唱
和許我爲朋儕嗟我已同古井水日久不汲欄生
苔藉君拂拭輓轡轉瑩然一鏡寒光開君如靜水
流石上鏗鏘琴韻聲泚泚忽然一激不可磯奔騰
浩蕩驚山雷雨兩人相視各相笑心期默印俱無猜
我知君心爲君友我讀君詩奇君才我今老矣百
無用寶山雖入嗟空回君其善用燕許筆明堂他
日覩鴻裁

汪潤之

雨園

春色臨卽市春風灑瀕船文人生得地才子賦由
天骨月偏多感知交每易憐憑將遊客意吟入短

長篇

與我同耽酒輸君獨富詩讀殘千卷後冥索一心

時遠擅吾宗秀曾邀國士知

孝廉受知于家舅
氏錢次軒先生

鵬塗比

貂續自笑亦頑癡

以上燕臺集

宋鳴琦

梅生

入蜀才人例有詩雲天萬疊境尤奇
桃花潭水春將近又是青山對子時

嚴學淦

麗生

證業眞靈不到詩君淹故國我天涯
路逢鬼笑謀生拙山畏人爭下筆奇
桂樹歌成招隱後桃花歸去學仙時
還從夢海雲飛處手取芙蓉折一枝

以

譚錫洪

梅臣

平生兄事兼師事爲慶彈冠惜掛冠舊句我聞巴
女唱新詩羣作海圖觀古來絕業須人替如此奇
才折節難惆悵摩天金翅影許多鸚鵡笑高寒
河嶽蟠胸氣未伸湖天著手便成春史書得閒將
詩補山水雖陳下筆新陸判有人爭畫扇升菴而
後此傳薪攜歸大可誇鄉里壓擔行裝不算貧

史

默雅堂

文星灼灼照蜀都錦江濯錦江滌紆彼蒼欲洩東
壁秘墮地特錫君智珠智珠光耀大千畛鑄鼎神

物供遣驅一塵不使滓慧業呼吸上通天帝居著
作等身紙早貴此卷更詫欬吐餘乍窺豹斑已奇
絕况復宛委探全書東方銘傳還寶甕屈子駕侈
飛龍車江山奇境助揮灑閱歷已半方輿圖我昔
識君客燕市卓犖氣象驚凡夫抽琴爭羨郢中客
使酒肯讓高陽徒雲間兄已作兄事異姓誼若同
懷李肩隨我竟等腹負小巫瑟縮愧大巫須臾聚
散幻蒼白東隅雖逝收桑榆雲萍風絮氣相感十
載宦轍同西湖昔游已快曲江曲此樂那放孤山
孤解囊示我長吉句觸目璀璨紛瓊琚八公制勝
役草木障海底績摘龍魚嘔心造語必奇險燭霄

紫氣騰湛盧三蜀在昔數才數千載復見今相如
此材那不列清秘太乙燃火窺石渠屠龍乃作割
雞用鳳羽化作王喬鳧三年治報鹽官最一葉更
縮錢唐符水清朗鑒快分照舉網羅得真珊瑚文
章根柢信深厚發爲經濟皆嘉謨此來值君六月
息俗塵撲落恣清娛相逢幾度各老大鉅集君乃
儕三蘇付之梨棗可壽世要令後學長追摹駭雞
珍握豈終屈郎官宿正輝天樞

畢華珍

子筠

平生未窮蜀道難誦君新詩神凜然恍如坐我青
天壁眼看萬里岷峨源詩人入蜀才始放元氣沃

蕩腸肚前杜陵無人渭南謝楊雄司馬不可攀曩

識潼川張太守

問陶

佳句脫口人爭傳君才十倍詫

綽厲斬竿摩壘塵無前少年銘閣攬天險壯歲題
柱陵江山風帆白馬下三峽出棧入棧天回旋西
遊咸陽東雒川直走趙北來趣燕燕都人文誰最
俊羣公座上珠簪挺一日散紙千百本聲價爛爛
高璵璠謂當排雲立薦達出宰乃與塵事緣縱有
治行稱第一此官何足羈騰騫病夫年來抱瘖啞
心跡有類匏瓜懸自從折腰謀斗糈窮鳥觸甯魚
吞釜小心乃更得訶謗俛首不敢酬語言逢人強
笑顏苦厚塵埃上鬢昂兩肩治龔何用傾社酒飲

水悔不對狂泉君今罷官未爲失

天子亦知才且賢願君韜章且減思幸秘此集流
人間早知儒術當柄任政坐文字爲禍愆眼中歷
歷費嘲弄信耳賤目搜夷堅犀照百物窮萬象青
鯨恠魅伏以跽狂揮急掃日不止真宰何罪遭鑱
鐫君能戒此勿浪騁從此頗無憂患干一朝簡書
破幽仄會須直至三臺銓君言世事姑舍旃有酒
恣瀉藥玉船當筵醒醉各不檢奇弄欲裂琵琶弦
天雞喈喈海色動雲日漠漠花光妍詩成一笑置
榮辱對景那不常開顏

心知堂詩稿

評語

鮑桂星

覺叟

集中模山範水則沈謝雁行述事抒情則杜韓驂
靳覈其宗旨大約禰四唐而祧五季宋元匪所思
存也星嘗謂晚近詩家北壞于覃溪之駭蹇南敝
於隨園之放浪必也合船山之才淵如之學而折
衷於李唐諸作者庶幾超施宋而軼王朱作者才
大而氣雄願一雪鄙言以間執海內談詩者之口

繼

昌

蓮龕

詩者禪也非有妙筆不足以寫仙心此三昧也近

人不識眞法眼藏轉津津焉分唐宋門戶陋矣少
海明府曾無塵滓學有淵源以余十年之長甘心
問字亦前世同結香火緣者出此以示眞得禪味
他日名業亦卽於此徵之

羅尹孚

子信

尊著五七言詩慷慨以任氣磊落以使才倜儻權
奇梟兀排盪杜牧之銅丸走坂駿馬注坡其筆端
之流利也柳子厚高秋獨眺霽晚孤吹其音節之
高亮也然擺脫浮滓標新領異驟而觀之幾莫窺
其象鹽讀一再過始知變眩百出終歸雄渾囊沙
背水淮陰獨能屈注天潢倒廻滄海遠則韓蘇之

支喬近亦鐵崖青邱之嗣音西蜀船山太守嘗謂人目我謂學唐學宋我祇知我用我法私竊以爲此真得詩人之意指也後有袁說友輩哀集全蜀文者船山太守而後此一大宗

朱昇佑

篁雨

讀癸丑至乙丑五集樸實似杜矯變似李崛奇似韓純以真性靈運大魄力不屑屑規撫三家而自然隱合皆由得山川之靈異宇宙之宏麗經史之精奧浸淫而入於古僕當鑄金事之

以上總評

查揆

伯葵

扛百斛鼎鑿五丁峽非獨力大亦由筆妙其文壇

飛將乎

史 廸蘭研

尋芳者追深徑之蘭識韻者探窮山之竹故選言
不歸奇與終與齊竿鄭瑟同音難乎其裂雲穿石
也此則雲璈九英非復人間常調矣

以上下峽集

楊芳燦

卷中紀行詩雄奇峭拔可追少陵而軼漁洋故所
選獨多

李鼎元 墨莊

奇翫之至漸近自然

以上出校集

馬若虛 實夫

才雄筆健骨秀神清匡山之青眉山之氣

宋鳴琦

梅生

奇情跌宕逸氣縱橫而一種慈祥慷慨之情溢于言表非僅爲紀游泛泛而設至濃奇平淡融會諸家已于散評略識一班矣

李宗傳

海帆

有才有氣有筆力有性情肝膽詩中之豪雋也入蜀諸作尤奇所謂得江山之助者耶

以上入棧集

嚴學淦

麗生

奇氣勃發性靈赴之嵌空玲瓏筆妙殆不可言狀

萍梗集

顏檢惺甫

奇氣溢出胸竟生雲硬語排空筆能屈鐵極豪放
中結構却至精嚴極平易中轉振又多突兀于此
藝可謂醇而肆粹而精者矣余與少海明府相知
最久唱和亦多從前少年所作凌厲無前未免稍
有劍拔弩張之態今則淘汰淨盡足徵學養功深
茲復出宰之江更得江山之助川中作手其將首
推巨擘乎

苑繁集

陳文述雲伯

尊作才奇筆健如長江赴海奔濤洶湧又如五丁
開山絕幽鑿險源出昌黎及少陵入蜀諸作

國朝則心餘甌北稚存仲則皆摩其壘近人中與
張紫峴周筇雲巖麗生皆當抗手與船山太史亦
復如騃之靳宜春木之傾倒不置也

心知堂詩稿目錄

卷一

髫吟集古今體詩二十五首

卷二

下峽集上古今體詩三十三首

卷三

下峽集下古今體詩五十一首

卷四

嘉州集古今體詩三十首

卷五

出棧集上古今體詩四十五首

卷六

出棧集下古今體詩四十二首

卷七

燕臺集古今體詩四十三首

卷八

易水集古今體詩五十首

卷九

春明集古今體詩六十三首

卷十

入棧集上古今體詩五十四首

卷十一

入棧集下古今體詩三十一首

卷十二

萍梗集古今體詩五十六首

卷十三

匏繫集上古今體詩四十二首

卷十四

匏繫集下古今體詩三十四首

卷十五

渡江集上古今體詩六十二首

卷十六

渡江集下古今體詩四十三首

卷十七

堤海集上古今體詩二十三首

卷十八

堤海集下古今體詩三十五首

心知堂詩稿卷一

成都汪仲洋少海

髫吟集

起癸丑迄辛酉成都作

西山白雪歌

吾聞扶桑之東廣延國雪花如掌黑如墨又聞河陰之
都太康時雪片如瓦紅如脂未披鶴氅一往見夢想奇
景目光眩蒼茫心緒無由開走上相如之琴臺琴臺却
比西山低正見西山雪嶺奇空際芙蓉七十二積雪直
從盤古計凸凹青狀不一縱有畫工難落筆偏當六
月尤晶瑩驕陽暴燒光四溢銀峯玉嶂何森森雨中欲
沒風中出大抵元陰凝結高壓天遂令萬古蒼蒼正色

八
卷
八
言
和
卷
一
寒如烟五岳丈人真
岌業俯視峨眉作婢妾
飄然似是范長生
逍遙鶴背掀髯立我胡爲兮
守故園仙之人兮招吾魂
君不見東有洪波浩渺之滄海
西有羣玉崔巍之崑崙

題李明府全家下峽圖

夔門三峽一千里
仰望青天窄於指
中有上古驚靈魂
噴濤奮浪此間水
巫峯十二何迢迢
爲雲爲雨高唐高
神鴉索食下空際
猿猱飛石來層霄
鬼門關接人鮓甕
險絕遊子憐不驕
我披此圖何雄放
意匠直與江山抗
怒流觸石下漩渦
大船如梭破巨浪
小船奔騰盡有聲
水花作雨飛而上
筆所不到意皆到
萬橈齊落一聲唱

幾時解纜辭華陽打鼓發船白帝傍小婦推篷汲江水
大兒吹火燒異香平頭奴子年七十蓬蓬兩鬢如繁霜
西川十載作循吏老去忽決抽簪計全家下峽歸去來
行人安穩布帆利嗚呼祇今已乘萬里風鱸魚蓴菜楚
雲東何時更作西征賦白雪清江渺雲樹

石燕歌

君不見汝州城內石成龍噓雲噴雨畫溟濛君不見雅
州城外石化狗月黑風高吠崖藪世間怪事那可窮理
之所無事偏有平生不解造化工零陵浩蕩生天風平
頭奴子笑且語昨見石燕飛匆匆磊磊落落明星爛雲
煙凝結不肯散倏忽奮翅去不歸柔毛玉翦皆依稀憶

采石芝提石斧路見石筍矗如柱西川石犀足已折東
都石牛耳難補越溪爭擘石蟹螯賓州慣焙石鼠肚肖
物無靈何足多冒名非實亦奚取嗚呼石燕爾何不爲
石雞啼扶桑夜催海日照八荒爾何不爲石雁飛廬阜
秋釀寒霜濕南斗不然或作昆明鯨石鬣森動雷雨驚
不然或作洛陽象石鼻迴卷菩薩相胡爲粲粲零陵水
不能扶搖九萬里有時深埋泥土中有時忽爲風雨起
君不聞山雀化石石含印白燕銜石石化璽

與游少甫

初

涼露霏亭臯夜氣寒江竹竹霧何微茫攬之不盈掬秋
風動樹枝林鳥那成宿人生似飄蓬安處未能卜自古

多離愁良會詎期復相思憶同羣把臂念幽獨愁思茫
無涯鷓鴣酒幸熟與君醉連宵世情任反覆

錦江觀漲歌

縣試作

山不登太華三峯之嵯峨水不涉黃河九曲之滂湃我
生幸在岷山之下錦江上日弄雲烟洗眼界五岳丈人
青城尊撐天拄地如崑崙四瀆之長江爲大獨開南戒
奔海門離堆鑿斷孽龍怒灌口飛出雙縞素舉盃邀水
水不住舉盃邀山山欲暮欲流不流水茫茫欲隱不隱
山蒼蒼岷山倒影入錦水巖嵐簸盪隨波光我胡爲兮
中流擊楫徒旁皇夢魂飛越兮踏浪不知江水長一氣
直瀉吞溟渤三山縹緲開扶桑圓嶠圓兮方壺方蓬萊

上有羣仙翔或騎赤鯉跨白鳳手把芙蓉朝玉皇我欲
竦身作鳥舉隱有羽翼森開張雲搏水擊九萬里翩翩
上入何有鄉不如漁蓑狎煙水扁舟老去心清涼

送別徐海帆夫子

諱曰晨江西奉新人

落日欲沒風笛哀黃面奚奴勸舉杯縱飲醞醕十五斗
離人愁緒亦難開蘆花疎密江干路遙誌使君從此去
他日持竿垂釣來好託雙魚寄尺素

支機石歌

忽見客星冲斗牛一朵頽雲從西下云是東都窮源客
來尋西蜀賣卜者袖中攜得銀漢歸一拳瘦石浪花裏
君平笑謂乘槎人北斗背上鑱雲根半凹霞紋麗如綺

猶是織女機袖痕自從此石留益部家家織錦如天孫
江波五色城綺麗寶布古風無復存纂組相耀爭奇巧
蠶市竹枝聲調新雲根瘦硬頑如鐵笑立人間太奇絕
但見金門之雷震不驚巨靈之掌擘不裂苔莓欲生暮
烟結靈光夜半時明滅噫支機石已不支機空復令我
生愁思卜人槎客長已矣何事嵯岬老不死

離情

楊花撲地流鶯語喚得離情滿春水春水如春時去來
離情萬古無生死若要離人不知愁除非春水向西流
冬日奉懷徐海帆夫子

晴日落木聲聲乾陰日落木聲聲寒飄搖隨風不自主

心能怨未能語人生聚散亦如此悲歡變易誰能擬

擬古

落日多悲風灞橋楊柳樹之子天涯行綿綿從此去行
行不可留去去復還住把臂訴衷腸悲哽不能語淒淒
復淒淒後會杳難期念此別離時惠我長相思

驅車上太行怪石紛磷礪回首見黃河洪波吞大塊心
悸忽如失與之赴溟海暝色從西來餘日散光彩大禹
抑已淪年命不相待借問龍門桐柯葉幾增改

飄蓬絕故根落木辭故枝隨風遠流離亦是不多時蹉
跎異鄉人摧心不言歸意緒如散絲杳杳漫何之欲渡
川無梁中夜長嗟咨

懷古一長嘯管鮑無其嗣鬱鬱道旁松佳色日凌替輕
言託膠漆中外實相異從來易爲好那不易爲棄緬彼
谷風詩何事揮涕淚

宿馬易之別業

諱賢成都諸生

萬古青城宅門開江上斜近山雲易雨臨水路多沙此
宿初嘗非重來定食瓜武陵明日別回首但桃花

登同慶閣

未見江流一息停浪花飛雨濕晴汀日沈南浦水如赭
雪滿西山峯不青杖底塵寰低莽蒼雲間夜氣老精靈
嘉陵一帶烽烟急忍向春風聲酒瓶

游西山便訪紫霞道士留宿

一朶白雲風捲去西山無數好峯青
秋來鼓角嚴邊戍
洞裏神仙讀道經
曲徑花香隨鶴夢
空潭水氣帶龍腥
生年二十心纔動
夜半鐘聲枕上聽

塞上曲

秋老鼓聲乾人登上將壇
雄心輕馬革殺氣奪樓蘭
水落黃沙瘦山空白日寒
歸來洗兵處萬幕雪漫漫

賦呈吳壽庭夫子

諱樹萱江蘇人以道員候補入蜀

官袍猶帶御爐烟下馬關河路五千
我憶文翁曾授學
夫子曾充四川主考遂任學使
人言韋相再籌邊
花中風雨思前度
杖底雲山補舊編
爲問堂階盈尺地其間於我有無緣

絕句

灼灼花并蒂蒼蒼木連枝鴛鴦銜紅豆從不識相思

大將

一片寶刀光森森冷似霜開門旗影動酣戰鼓聲忙
慎算追騎虜多謀得預防捷書良易草未敢奏長楊

送陳鍾溪夫子

諱希曾江西新城人

校試南中諸郡卽以誌別

幃帷到處卽門牆十萬人材玉尺量林外河聲羗水黑
馬頭秋色颯雲黃要從文字求真士不惜春風被遠荒
再拜軒車歌一曲素心遙並雁南翔

鍾溪夫子以和楊荔裳方伯

諱揆江蘇金匱人

試院卽事詩

見示依韻和呈是歲下第益亦感慨因之矣
百隊參天旌旆長龍蛇映日影迴翔玉京星使方持節

水國儒生各擅場可有珊瑚嗟漏網頻看翡翠已生光
秋江不盡芙蓉樹取次飛花入建章

高山引領仰崔嵬浪入龍門絳帳來志欲騎鯨徒幻想
詩能倚馬愧羣才無端孤負春風座猶是尋常朽木材
萬頃洪波聲瀕洞何能飛越到蓬萊

綠雲萬朵截飛簷棘院沈沈令肅嚴永夜挑燈曾背月
斜風掠地一掀簾筆垂秋露毫時凍硯結宵寒墨屢黏
何意參苓終見廢藥籠深處未能添

商量舊業已多時上日重親海鶴姿落筆烟霞生尺紙
深秋風露讀新詩由來白雪歌難和剩有青衫淚不知
遙憶他年風雨夕辦香拈處望雲思

心知堂詩稿卷二

成都汪仲洋少海

下峽集上

起辛酉十月迄十一月道上作

趙家渡

秋江滉漾碧琉璃萬里征程第一詩記取鯉魚風正好
紫雲山下峭帆時

金堂峽

峽逼風掀浪灘空石搏人輕舟纔一葉轉舵竟千鈞覆
沒真無地扶持或有神回頭嗟岸上釣者坐垂綸

簡州鹽井

天心本仁愛應有不須請澹食虞九州調和得平等東

南處窪下鹽田漉滄溟西北據高阜鹽池分畦町惟蜀
應井絡處處開鹽井自昔陵州著今在嘉州境不識井
多少但見煤烟猛飛鳥無素翎染此黑雲影簡州井雖
稀厥味較清永

簡鹽色白味比嘉州畧淡而入厨則香雋過之

當其相地脈措手爭

要領低者傍山麓高者踞山頂山頂或簡便山麓反險
迫瀛海含大地嵌空耐尋省井口五寸徑直下鑿挺挺
千尺洞龍窟吹毒散淒冷洒水使毒解側耳聽疵肯補
塞澹水穴鉤出石屑梗神臂疑百丈探幽輒中肯精銳
破艱滯庸瑣變奇警汨汨鹹泉來日夜汲昏冥剗竹爲
長筒擘竹爲修綆排竹爲盤車中有木爲秉修綆盤車
上收放隨馬頸八駿識人意但聽鼓聲倣按轡乍蹀躞

加鞭漸馳騁急若旋風旋飛奔絕光景戛然鼓忽住駐
足遂不逞用良馬八匹環排盤車以鼓為節汲泉而上鹽丁接竹筒瀉之百斛鼎
烈火圍鼎紅煮作素金餅飛泉自流出富順特徵幸順富順自流井有鹽泉自流不須人力

富順火井

燧明有火樹神邱有火穴西域有火山草木不萌蘖豈
識沱江濱火井更奇絕井本為鹽鑿得火用迺別燧燂
氣湧出但如雲霧結泉壤熒台見溪峒亭戶悅通中接
長竹千竈分引熱家火畧燎動真火遂明徹火根不到
地初如一線凸數尺漸高大炎芒吐猛烈隆隆聲如雷
風熾雨不滅千觔鹽鑊中鹹泉變成雪竹口泥盡焦竹

八
竹
言
卷
二
二
筒筠不熱神鬼駭光怪乾坤秘局鑄或用皮囊裝鍼入
焰隨泄夜行代燈燭千里可攜挈我意真陽精天爲灸
病設扁鵲久不作此事爲誰說

油井

但訝火在井誰信油可汲我行親見之夢想杳不及番
舶泥油乾延州石油濕非石亦非泥井油足鼎立臭味
頗難近黝黑色憚挹試以添燈檠居然焰爍熠晦迹藏
聰明懷才不滯澁光芒偶吐露星月同出入荏桐與烏
柏爲用豈不合彼直爲錢來此不需價給物亦有品性
乃能備緩急蜀產多奇偉耳目駭近習事雖不經見理
實非龐雜火是硫磺精油是硫磺汁

撫琴臺

尹吉甫子伯奇
作履霜操處

小弁詩後履霜操一代君臣淚共傾落日呼天江上石
七弦哀怨不成聲

貓兒峽阻風遂登山間佛閣

曉起聽欸乃轉柁何逶迤舟子相娛樂時時歌棹歌遂
下貓兒峽孤艇疾於梭連峯渚圻裂疊嶂撐嵯峨石乳
森如柱交錯懸岩阿白雲飛不去萬古相摩挲幽陰失
早暮高峻迷羲娥饑鷹呼未已打頭風亂過流水與之
逆空江聲不和陽侯騎龍出兩手掀洪波鷁首亂搖點
倒轉落盤渦却使下峽人翻乘上峽艤忽撞危磯下舍
櫂攀藤蘿已復挈長纜乃涉石盤陀巖腹自虛空祇樹

藏阿羅詰曲徑途異玲瓏門戶多千層累蟻蛭萬竅開
蜂巢化工露神巧補天遺女媧倚闌忘出險異境滌煩
苛靈旗若愛客洞口時婆娑

重慶府

我聞崑崙閨苑翠水環羣真縹緲層城巔何時鰲負入
中國仙境不改落人間但見重樓複閣壓翠阜下插江
水上入天粉垣堆作白雲起紅燈直挂青霄燃晚來江
干更奇絕倒影照徹蛟龍淵南徼滇黔貨銅錫北道涼
雍來裘毳連舸大編下三楚旄牛竿馬通西番繁華真
是大都會險要但守浮圖關當時獻賊恣蹂躪四日而
陷胡爲然瑞王闔宮飲白刃死事三忠

明巡撫都御史陳士奇重慶府知府王行

儉巴縣知縣王錫
同日罵賊死甚烈
流血殷屠戮老幼無噍類
丁壯臂斷耳
鼻刳馱之郡縣駭良懦
破竹勢下東西川百六十載備
休養人烟富庶如從前
蠻妓不解巴渝舞
客籍誰彈蜀國絃
月明歌吹竹枝調
石板開花淚始乾
巴瀘間謠歌有眼淚流在石板上石
板開花我回頭之句
兒女情詞致楚楚
英雄感慨心悁悁
欲認江流是巴字
請君明日登塗山

塗山

禹穴異生死其說姑兩存
塗山只一娶議訟尤紛紛
難端自誰發常璩酈道元神聖
亦人耳人情詎不然
蜀山嫁昌意創例非曾孫
巴渝望石紐僅隔數重山
蜀人娶蜀女理近情亦安
當時導江水於此三過門
試上啟母

石指點遮夫灘呱呱不肯顧想見胼胝勤

浮圖關

關有明將軍劉綬詩碑

江城浮水出一徑鎖重關扼要通三楚居高控百蠻潮
空明月峽木落縉雲山剔薜蘿題句摩崖字已斑
長壽弔雪菴和尚

蜀道驛程記靖難時雪菴和尚遁跡於此與隱
士杜景賢往來白龍山中結廬其間每夜梵誦
琅然人或窺之乃易乾卦也時棹小舟中流攜
楚詞誦之誦一葉輒投一葉於水投已輒哭人
莫能解也而不言其姓字按明史紀事本末從
亡二十二人中郭節連州人時稱雪菴後稱雪

和尚往來道路給運衣食永樂八年與史彬程
亨各攜方物至滇獻帝建文前後凡五入蜀或
者節之結廬白龍有由來也

金川門啟燕飛入落月偏顱天子哭打碎鐵匣披袈裟

教授御史頭俱禿

吳王教授楊應能
監察御史葉希賢

翰林程濟稱道人九人

隨從鬼門出御溝出者十三人神樂觀中夜會宿自此

雲游無定蹤飛龍晦迹爲潛龍三人左右資禦侮

楊應能
葉希賢

程濟給運衣食六人功紛紛偕隱易名字槎主

即宋

樵夫

即牛景先

衣葛翁

即趙天泰

補鍋家世作生計

王之臣號
老補鍋

馬二子或

稱馬公

馮

郭節晚號雪和尚曾持方物來滇中白龍山

上龍潛處

建文在海之
白龍山結茅

渝州山名適偶同結茆亦不忘君

父患難之際眞純忠當時偵探頗急迫使者託指張三
丰三十九年五入蜀雪庵郭節初名或者頻相從琅然梵誦
聲猶在不是番經是乾卦孤舟放櫂哭聲高離騷手裂
投江瀨招魂直擬下巫咸觀象陰欲占否泰我聞帝命
程道人秉筆錄述從亡臣藏之山巖世未見傳聞漏畧
如此云據地狗餽識吳亮左趾黑子猶無恙不封不樹
西山墳一坏之土堪走訪白龍山下江茫茫無處更覓
雪和尚

涪州用陸放翁韻

州有古樹如龍王龜
巖蔡白石各有題名

點易巖前繫客舟扣舷歌罷思悠悠題名欲徧千年樹
載酒仍窮萬里游落日迴光騰鳥背空江倒影射城樓

名園荔子甘無比不解行人望古愁

忠州

州有陸宣公初葬墓基及白太傅祠堂

畫裏樓船鏡裏人江城百尺映斜曛青園太傅祠邊樹
白繞宣公墓上雲登岼馬蹄行緩緩泊堤帆影卸紛紛
而今四海爲家日不用巴臺望楚軍

石寶砦

一握皴雲冷凌波不肯沈飛來瀛海外湧出大江心
歷歷層樓峻泠泠晚磬深憑高吾欲嘯落日和龍吟

廟磯子

大禹導江水水勢從天落直下趨東南荆揚作巨壑
驅山扼怒流橫腰亘鎖鑰一激不受羈奔騰轉上躍變狀

原無窮古來說險惡其中巨雷响其外長風搏混淪陷
日月瀕洞出蛟鯉笑天飛湍高裂地盤渦廓驚潮忽暴
灑奔溜亂廻薄怪石如羣獸騰波向人攫利涉安可占
輕舟無住著簸盪忽磨旋傾欹再前却停橈不能下色
然相駭愕呼吸化波臣隨流朝海若更生賴舟子奮勇
力盤礴喧逐轉柁聲濤頭只一掠出險爭酬神鞠躬澆
醴酪落日翻洪瀾更向瞿塘泊

東屯高齋弔杜文貞公

羣峭不敢逼高齋得地寬詞源倒三峽秋興寄長安百
世祠堂在前朝券帖殘浣花來蜀士當作里隣看

永安宮

孔明慨惜孝直死秭歸江上黃雲起一夜燒營七百里
魚復改爲永安宮餘氣尚欲吞江東大耳天子眞英雄
父事丞相誠阿斗魚水君臣世未有閔宮祠堂竝不朽

白帝城

峽逼城更高白帝依南斗一礮轟當衝百萬皆驚走憶
昔公孫述跳梁矜小醜欂櫨柱擁門樓橫江恃扞擻征南
飛炬來任滿忽授首明昇學井蛙防邊置戍守安知廖
永忠鑿壁梯天陡負舟而登山廻櫂爭峽口誰言鐵鎖
强斧斷如拉朽在德不在險斯言自古有厥頂揚靈旗
竟有神誰某惡聞鼓角聲雨石恣擊掎舟人布纏篙急
過爭恐後聲歎聞無聞欲言惟以手我本蜀中人仰空

醴旨酒布帆千里歸還應爲汝壽

甘后墓

楚客歌湘女曹家賦洛神何如綃是月直有雪爲人耐
葬依先主空塋護野民蠆磯祠下水鳴咽獨酸辛

灩澦石

雲間落怒猊倒吸夔門浪腹飽忽癡重騰風不得上難
從烟雨中咫尺辨殊相如馬或如牛由來無定狀何能
載酒遊巨眼爲開放

入峽

忽訝羣山合江從何處去撥櫂見峽門衆流如束素白
鹽何清挺赤岬實雄據嵐光對潑洒雲氣莽交互巉天

萬仞起讓水一線注駭彼斧鑿痕疏導想神助舉頭讀
碑碣低頭挹灩澦漢相留手蹟幽閼忽敞露峽有武侯題名碑云瞿唐
灩澦摩抄古苔蘚崖壁穴無數椎鑿如方櫺插木作梯
度魚貫衣青蓑潛行雜草樹高高上無極猿鳥駭相顧
奇謀踰裏羶險地直飛渡五百年後人傳聞竟舛誤壁
有數爲方眼者參差直入雲際插木之未壞者猶存一二爲明初廖永忠遺蹟土人不知呼爲孟良梯志乘亦沿其誤殆未考也磊落
念前烈慷慨發情懷終日苦吟哦何時見施措破浪乘
長風無事更猶與

瞿唐峽

江勢何太急峽勢何太逼萬派恣湍悍并力爭阻阨五
月六月時一漲數百尺漩爲谷杳冥瀆作山巔芳飛沫

正湔涌凌濤忽崩濤偏廂讓中權西流反迅激其險不
可述傳聞本在昔我於嚴冬中鼓櫂學游客水平溶鏡
光山峻凸雪色兩崖多變態一路快新獲矯矯龍張鱗
翩翩鶴垂翼蹇蹇馬拳毛昂昂魚露脊老象鼻凝凝文
犀角齧齧雕虎質般般祥麟神奕奕天傾翡翠青海立
珊瑚赤日落玻璃黃花開茵苔白霞飛組練紅雨結雷
霆黑星聯蟹眼丹月帶蛾眉碧其上刺重霄森森排畫
戟其下入無地壘壘監堅壁其中藏鬼神隱隱靈旗覲
其外掛猿狖空空荒洞圻遠近奇煙湧左右秋濤隔四
十九渡江一百八盤石當年吳道子僅到嘉陵驛惜哉
大同殿屏障少奇迹

巫峽

瞿唐洵清雄巫峽更奇秀元黃慘黷餘瀕濛意匠構天
才不復襲文心自奮鬥神工與鬼斧斂手駭鐫鏤驚靈
及帝禹疏鑿那得就上刺高天高下裂厚地厚峰影略
辨認參差露清瘦詭譎不全見諦視忽已又恍惚欣有
得雲氣陡卷覆迷離悵若失嵐光忽通透亦擬因名求
縹緲滋誤繆翩然神女來含羞欲弄袖險哉穿心石橫
空有虛竇絕頂饒奇觀兩崖備希覲有若崑崙圖生面
偶邂逅橫掃五岳眞遠洗三山舊微茫入幽眇細膩不
奔驟斧擘痕斬新麻皴法繁湊窈窕開玉城琤璫滴紅
溜丹青此鼻祖顧陸昧推究又若錦戰袍女紅難逼僞

陸離五雜組彩錯十纓繡銀泥細細鋪金縷絲絲扣
突作海水立層暈魚紋皺中嵌杪羅花點綴皆中
腴鉞奪天孫巧帖豈王母授我願變神鴉烟嵐自
哺鷄船頭聽權譌攫肉引羣噉并願爲猿猱巖穴
啼清晝撩引沾裳淚不用雍門奏

出峽

峽裏流水深棹聲空無底兩壁嵌天光青餘一綫耳
陡然山勢開耳目厥千里雲夢雖未吞烟水浩瀾瀾
洲渚蔚蘆荻時有漁歌起安知非靈均吟魂出湘水
亦欲反離騷投閣羞揚子回頭望峽門從此去鄉里

巴東懷古

一道寒江逼縣門
秋風銷盡相公魂
孤舟可渡無人問
疊翠閒歸有屐痕
力捧黃旄臨朔漠
行知白雁到中原
殘陽萬里供吟眺
蠟淚成堆莫更論

人鮓甕

灘惡非尋常
聞名使心恫
奈何人與鮓
逕欲驅同甕
撥棹當其衝
先聞水聲鬧
篙工及游子
性命各輕送
凜凜相戒嚴
一嘗蛟魚弄
前波衝石過
後浪駕風控
勢急怒紆迴
盤渦中反空
初如一間屋
旋成千丈洞
夷然流欲合
突起亂峰縱
處處幻無端
時時真有恐
巧避耳目眩
翻然多誤中
吾生付柁工
不若姑悻悻

歸州

只有灘聲似舊時登臨還憶放翁詩空城細數流民屋
故壘高揚大將旗刼後亂離原若此機先防護竟何爲
多情好是春來鳥不住枝頭叫子規

新灘

蜀道驛程記嘉靖間龍起山崩水勢騰湧因名按放翁已謂新灘峻山最險處由來舊矣云云考之蘇詩有新灘阻風之

作又在
放翁前

見水不見石搏山如搏雲飛龍有奇力破壁自古聞耳
目未到處信否真難云及此得遺迹乃知神物神哉
千丈峯壞裂三十里一半撐江于一半沈江底撐者勢
將崩沈者浮欲起化作軒波翻中流立而峙嗟哉憑兩
槩命與水石爭幸有懸巖路可以避險行遂著謝公屐
猿猱登不平却從千仞上俯看放舟輕舟如箭離弦水

如雲迸電龍門千丈強一落驀無見練飛懸溜春雪湧
浪花眩心驚魂自招膽破色皆變忽復下游中帆檣出
水面歡言得無恙疾走呼餘皇舟人相顧謂生全謝上
蒼斗桶并力汲一浪在船倉繫纜復解纜行色何匆忙
灘聲如雷急怕有龍飛翔

將至黃陵廟作

一葉扁舟泛酒徒桃花三月水如酥空舸峽外啼猿少
坐向春風聽鷓鴣

江山萬里記初遊過好歸州又峽州未覺鬢絲朝暮改
行人原是下黃牛

灘聲過耳三千里鳥道回頭十二時夜泊黃陵無箇事

月明江上讀歐碑

黃陵廟懷古

廟始于蜀漢武侯所立明石砮
秦良玉益以侯像並有題字

白帝踏雲牛踏浪樓船左右迎丞相鼎足三分從此開
翻身飛登青玉嶂興王有兆非尋常空江廟祀留馨香
滄桑變幻天難問獻賊西來屠華陽官軍隊隊胡爲者
碎擊金甌如破瓦石砮夫人白桿槍請纓獨上桃花馬
平臺召對何堂堂殺賊歸來環珮鏘一樣承恩拜天藻
臣妾羞同楊嗣昌嗣昌辦賊心良苦奇計非勦亦非撫
將將無具左賀驕驅賊入蜀爲全楚三十八隘撤戍兵
蜀撫不解固吾圉藩籬失却守門戶曹操獻忠入夔府
張令旣敗次及我杯酒論兵淚零雨懸知蜀地盡陸沈

高樓百尺思忠武搏土爲人師女媧丞相與神成一家
題名大署司宣撫巍然石碣存三巴韻事可歌功可紀
風流慷慨難爲擬居平盡道奇男兒作事誰如小女子
君不見邀兀术會霸先當時亦是兩嬋娟

蝦蟇涪

水晶泉列第四

蟾蜍蝕盡瑤臺月靈光滿腹難收拾吐作人間清冷泉
明珠大小隨噓吸千年石髮裊參差十里山花開厭浥
撥棹晴江思鬪茶挈瓶先向雨中立